

Epeso Vegenalitini Luhuva Pauló Gizo Kimimó

Epeso vegená nónohá kimike gizo kimi gakó

¹ * Neza Paulona Ómasímini gakotó Izesu Kilistoni aposolo loló utímina Epeso numutoka monó gele vegená Izesu Kilistoni monokú alévolé iki miniaká nia vegená lekeza luhuva netá imane gizo nolukumuve. ² Ameteho Ómasi itó Guivahanite Izesu Kilistó aitokatí nasahilí itó hulu lekeli-toka mino moloko minatize.

Kilistotoka gímizunimómave loko monó lusa haitopaitolímini lehizeletamó

³ Guivahanite Izesu Kilistoni amelaho Ómasi áisi nene nónohá zeletake okulumakutí monó lusa haitopaitolímini Kilistotoka voko gímizunimómave loko lehizeletamó. Lehizelimikumú geké lotatunize. ⁴ Áisi nene gozapá ká eláa mikasímini guhaiváa utó onamigo ezáa avogisalo apazá etó iki keké vizikigó minatave loko Kilistotoka miní amitave loko lelémó etó imó. Lá ike, agika limike, ⁵ ganatili gelekago minakumule loko Izesu Kilistoni nasahilí oletake kelémó lá okugo aí izegipala minatave loko lo hutamó. ⁶ Eza gipala gihila áisi lapanalagi nasahililagímó hagitana oko lehizeletamó. Nenemú geké lotoko minatune. ⁷ * Izesú eza golanivatunú meinavate hizelimiake gologí oletake golesa netate gilatoletamó.

* **1:1:** Apo 18:19-21, 19:1 * **1:7:** Kolo 1:14

Nenémini nasahililáa lelitoka ohunagi minokave. ⁸Nene avevezahaló ohunagú ligikagú luhuvagi itó geleaká gihiláa napa oko leke vizeletamó. ⁹Lá ike ezáa agikatumú gele minamómámini asuguná gakó ganatilisí geleake láa loko lo hukoletake ale vesamá okave: ¹⁰Eza gamenamú giligo minamó nene alitokiko Kilistó nene netá matá mukí okulumakú neha itó mikasiuka neha ale nupa napa nenémini gotoláa loló itive loko lo molamó.

¹¹Itó netá matá mukí nene Ómasímo ezáa agikatumú gilike lo hukató aleaká noi ve áisi gozapá ganá agata gilike lo hukoletató monó helisa henoni ali alitave loko lelémó etó imó. ¹²Nenemú ganá apí oko Kilistokumú lagata losi gelemoko ageva oaká uni vegená leza Ómasímini lapaná ale oteko minatune. ¹³Itó lekeza ámina iki gakó gihiláa lukugutó vizi gakó lamaná nene giliake, Kilistokumú gili alévolé ikago, lo mololetató nene Sikalahú ganatilisí lehizelikimikago Ómasímini anosagi lilí inamóma neve. ¹⁴Okulumakú Ómasímini monó helisa henoni ali lá itave loko gozapá lo huko mololetamómámini zazaváa nene Sikalahú lehizeletamó. Itó aí vegenala zuha lelí meina hizelimiaká hozaváa apí imó nene aleloko voko ale lutiginogo ive. Nenémini mogonáa gele vevesatune loko Sikalahulímini anosagi nominune. Nenemú Ómasímini lapaná ale oteko minatune.

Epeso vegenakumú Ómasiloka limó

¹⁵Nenemú lekeza Guivahani Izesukumú gili alévolé iake monó vegená likigivetikini likigika

kimiaká niamómámini gakola gelekukeve loko,
¹⁶ lekelikumú Ómasi agepoka loaká noumú nene
ahulosá amuve. Lekelikumú láa loko Ómasiloka
loaká nouve: ¹⁷ Guivahanite Izesu Kilistoni
amelaho lapanalímini amelaho Ómasi áisi nene
Sikalahú lehizeleketoko likigika alémo vávani
okoko Guivahanímini mogonáa lo lekemekiko gili
guni iki netá mogonamú gili vevesiki gilitaze.
¹⁸ Lá niiki likigika lakagata ale koló okiko,
Guivahanímo lekelémo otopá zimómave loko
okulumakú gonanalísímú lakagata losi gelemiki
ageva iaká nia netakumú gilitave. Itó vegenala
zuha lekeza monó helisa henoni asaivagi ali
lá itakumú gilitave. ¹⁹ Itó leza gele alévolé
uhatoka amuza sipisi alévolé helisatunú hoza
aleaká noimó nenémini napavamú gilitave loko
Ómasiloka loaká nouve. ²⁰ * Ámina alévolé zamuza
sipisitunú nene Kilistó hilikutí mómoká oko alémo
oteake okulumakú agizani lamagaloka alémo
molokago, ²¹ kiapege itó gamani itó ve napa
itó amuza ve iti minamó haitopaitolímini keí ve
uvóipo ahulokimikago mina vegenalitini kugulizá
nene lemeko noigo, aí agulizaláa mino veletó
oko neve. Itó itínasagó nomive. Alika utó iti
gamenaló iteko minanogo ive. ²² * Itó Ómasímo
netá matá mukí nene Izesuni heumauka mulisi
moloketake ámina netalímini gotóini loló itive
loko hize otemiake vegenala zuha lelitoka alémo
molamó. ²³ Itó monó guluni vegená leza Izesuni
agupe makó loló okuko lelitoka gizapa noletago,
netá matá mukilímini agikagú mino vaí oko noi

* **1:20:** Age 110:1 * **1:22:** Age 8:6; Kolo 1:18

vémíni agikagú minoko aleko oaká noune.

2

Lemeni heleneikutí lelémo mómoká imó

¹ * Lekeza gozapá nene hokolizá pakalizá iki lihimatinigi minikagove liki lekemeni hele vimó minamole. ² Nene gamenaló nene lekeza mikasímini gapo golesagú nivake, vogalaló zámuzagi netá matalímini gizapa ve golesaló gímiziake ámegetiaká amó. Aí ametamenímo itína gamena nene Ómasímini gakola pelevesava ziaká a vegenatoka hoza aleaká noive. ³ Leza gozapá kezagitana oko minunike, litaha ligikámini lagaváa ámegetoko loló oko lugupémini itó geleakalímini gakoláa gele alekunike, vegená lugáa minamó nenéminoko Ómasímini mesahaváámini mututoni loló unimó. ⁴ Lá oko minuháza, Ómasi áisi nasahilila mukí minokagove loko nasahilí sipisi oletake agika limimó. ⁵ Lihimategi minunitímo lemeni heleloko vimó nominuko, Kilistogegi lelémo mómoká okago, otunimó. Gilinahe. Ómasímini nasahililatunú lugutó vizimó. ⁶ Itó Izesu Kilistotoka lelémo gímizekago ligikáa lemeníatunú áisigi mota okulumakú minoko aleko oaká nounimó gelekave. ⁷ Nene alika gamenaló utó omo omo iti gamenaló nene agika hize limike Izesu Kilistoni nasahilila ohunagi limimó nene ale vesamá oletanogo lá imó neve. ⁸ Gilinahe. Eza lugutó vizimó nene aí nasahilitunú neve, itó Izesunimú gele alévolé unimómave loko neve.

* **2:1:** Kolo 2:13

Nene lelí amuzatunú nomive. Ómasímo hagitana lehizeletamó. ⁹ Nana hoza ale minuko nenémini oletamó neve. Nene ma nomive. Nenemú lugupe aleko iteakaláa nomive. ¹⁰ Leza Ómasímini agizani luhuva nouko, ezáa Izesu Kilistotoka miní amunikeve loko mogona lamaná lilí itave loko lelémó utó molamó. Itó neneló lisi lisi iki vitave loko gozapá ámina gapo veleletamóma neve.

Kilistotoka miní amunikumule loko lelémó hamó onóimó

¹¹ Lekeza gozapá hetoka vegená minamó. Itó Zuta vegená keza kugupéitó Ómasímini anosagi minamó nenete lekelikumú aliki mumusopa ziki anosagi nomi vegená niave liki liaká amóza, ha kugupémini anosamú linamóma neve. ¹² Nene gamenaló lekeza Kilistogegi apiziki minamake otopá ziki minamó neve. Itó Isilae vegená lelí mulusigú minamake, lekeza hanuva gutá minamó neve. Itó Isilae vegená kelémó molokago keza lo múnahi gakó lo moloketamó nene ali minikago, lekeza amegesaloka minamó. Imane mikasiuka nene netá gihilamú ageva gemake Ómasigi minamamóza, ¹³ nene gamenaló lekeza hotoka gihisigú minakutí itína gamena nene Izesutoka miní ameke Kilistoni golanímo geisa mikú lekelémó molokago imi anitiki niave. ¹⁴ Ezáa nene nonagá itave loko lelémó apizeaká ve noive. Itó leza Zuta vegenaki lekeza hetoka vegenaki holutegú logoka hotopotó okago minuhalímini geisa nene aleko tele vizeake lelémó hamokú molamó neve. ¹⁵ * Itó Mosé lo hukoko li gakolímini agikagú nene

* **2:15:** Kolo 2:14

alilo alemilo liki haitopaitó gakó linamó nene ezáa agupe ahulake mukitó ipá oko ale ahulokamóma neve. Lá oake, Zuta vegenaki hetoka vegenaki mulusi lositá lelí holutegú minoko aitoka gímizunimómave loko ezáa lelémó gosohá vegená hamokó loló oake minake nonagá ale utó imó. ¹⁶ * Eza zohota zaló nohilike, vegená mulisi lositá lelí lovasava oko minunimó nene apele heleake, Ómasigi lelémó mukipa imó. ¹⁷ * Lá oake, gihisigú minamó hetoka vegená lekeza itó geisa mikú minunimó Zuta vegená leza mukitoka hulúmini gakó lo lemekago gelekune. ¹⁸ Lá oake, gapo velelimikago, leza Zuta vegenaki itó lekeza hetoka vegenaki Sikalahú hámakolímo gapo velelimikago, ametehe noitoka vo anitesá neve. ¹⁹ Nenemú itínasa game-naló nene lekeza hanuva hepelaloka gutá ve minamave. Lekezagi monó vegená lugáagi Ómasímini apá amelage noune. Itó Ómasímini vegenala zuha loló oko noune. ²⁰ Aposolo itó Ómasímini agepagutí gakó loaká ve leza lukesava loló oko nouko, nene-tini lumupiló hize lé olikimikago miniliki viki niave. Itó Izesu Kilistó nene numuni lapusaváa loló oko noive. ²¹ Numutó namató vegená Guiv-ahaniloka miní amekuko, aí apazá zagusave utó oloko voko napa oaká noive. ²² Sikalahú nenémó lekezagi ámina oko aitoka lekelémó miní amekago, Ómasímini numuni apá lilí ikago mulutikú minoko aleko oaká noive.

3

* **2:16:** Kolo 1:20 * **2:17:** Isa 57:19

Pauló hetoka vegenakumule loko monó hoza alimó

¹ Itó neza Paulona nenemú hetoka vegená lekelikumule loko Izesu Kilistoni gelekeleláa minuke nagá numukú nouve. ² Lekeza nenikumú nene Ómasímo nasahililatunú oko lekelitoka monó hoza alitane loko lonetonoimóma neve liki gilinave loko gelenouve. ³ Eza asuguná gakó amegesáa lo utó moloko lo nimimó neve liki mota gilinave. Ámina netakumú goí oko gakó alínipáisí gizo lukumumóma neve. ⁴* Lekeza ámina gakó gatiki nigiliki neza Izesu Kilistoni asuguná gakó amegesáa nene nigikatunú gele vevesoko gelekuke ángoaká umoláa lekeza gilitave loko vesamá oko ámina luhuva gizo lukumumóma neve. ⁵ Ámina asuguná gakó amegesáa nene gozapá miniliki va vegenatoka utó amimóma neve. Apazá aposolo itó Ómasímini agepagutí gakó liaká ve lelitoka alika Sikalahulímo lo utó moloko limimó nene láa loko neve: ⁶ Gakó lamaná lo molamó nenémini gihiláa nene Zuta vegená minamamolaloka itó Zuta vegená lelitoka hámakó avevezahaló mulusi hámakó loló oko mininake Izesu Kilistokumule loko lehizeleketatove loko lo mololeta netá izá moloko alekuko lelí mututoni itive loko lonoimóma neve.

⁷ Itó ámina gakó lamanalímini gelekeleláa loló itane loko Ómasímo nasahililatunú oko aí zámuzaló moloko gele minake nenitoka ale utó molonoimóma neve. ⁸ Monó gele vegená limiki minakutí neza lemeko minumolámina Kilistotokatí minumuni gatoko gato asú

* 3:4: Kolo 1:26-27

amoakalímini noimó nenémini gakó lamaná nene Zuta vegená minamamoláa lo utó moloko lo kimitane loko nenémini hoza gakó lonetonoimóma neve. ⁹ Ómasímini asuguná gakó amegesáa nenéminoko hozaváa aleko ale asú itove loko agata gili mogona nene neza lo utó molokugo vegená mukitoka gilitave loko lonetonoimóma neve. Nene Ómasi eza netá matá mukí ale utó onoi vémo ámina asuguná gakó amegesáa nene ezáa agikagukó halá geloko voko minamó. ¹⁰ Láa loko Ómasímo agikatunú gilimó gihiláa nene Ómasímini vegenala zuha leza itína ale vesamá okuko, Ómasímini gele vevesoakaláa haitopaitolímini nene okulumakú agelóini kugulizaki ve niamó itó amuzáiki ve niamó keza ániigiiki gili guni itave loko halá geloko voko minamó nene, ¹¹ Ómasímo eza gozapá netá matá ale utó onamike agikatunú lo huko mololoko iteko minamó nenémini gihiláa nene Guivahanite Izesu Kilistoni amiselekago ale utó molamó. ¹² Aikumú gele alévolé okuko gapo veleko lovolovo zeletamó nenemú lelegesá legemiko Ómasímini avogisalo vitune. ¹³ Nenemú láa loko lo likimitoze, gililo. Neza lekelikumule loko gasovagi netalímini amupiló nominugoma, likigika lememino. Lekeza nenemú giliko gonanalisi netatini loló ino.

Kilistó agika limitímini mogona gilitave loko Ómasiloka limó

¹⁴⁻¹⁵ Nenemú nene okulumakú miniliki vamó itó mikasiuka minoloko vunimó mukilitini ametehe gihila aí nalapusa hizeko gupá ze ameko lekelikumú numuna láa loko loaká nouve: ¹⁶ Ómasímo

eza ohunagi lapanalatunú Sikalahutoka lokago lemeko zámúza ale utó mololikimikiko, likigikatinini napa alévolé itive loko, ¹⁷ itó Kilstokumú gili alévolé iminatímo eza mulutikú minoko aleko itive loko, itó agika likimitímo luhusatini ale gilitoko lukesalini loló okiko, ¹⁸ lekezagi itó monó gilina vegená lugáa mukitoka kezagi Kilstó agika limimó nenémo livilege zaká maká oaká noikumú gili guni iki gilitave loko, ¹⁹ itó Kilstó agika limimó nenémini mogonáa nenémo vegenalita geleaká nene avilege zaká maká oko nemó nenemú hanuva gili guni ikiko, Ómasímini agikagú laga netá vaí oko noimó nene lekezatini likigikagú vaí oko minative loko Ómasiloka loaká nouve.

²⁰ Ómasi eza ligikagú hoza aleaká noi zámuzalatunú eza oko moloko oaká noitímo loká oaká nouni netá itó lagata geleaká nouni netá avilege zaká maká oko golivagi netá loló iti vémini luhuva hutilí ino. ²¹ Aí vegenala zuhalita oko moloko itunimó itó Izesu Kilstó oko moloko noimó nenémo Ómasi geké lotatunimó nene omolelé amalelé oko lagapilamotoka minoloko iteko minino. Lamaná.

4

Sikalahulímo lelémó hamó ikú minatune

¹ Neza Guivahanimule loko nagá numukú noutímina lakagata aleko lo likimitoze. Ómasímo iteko mina netató sele lo likimimó nenémini sisihetokó miniki aliki ilo. ² * Lá niiki likigika aliliki limiki mulutikú geha ziko hulugú miniki goselé likipiliti netá alilikitatakumú goselé

* **4:2:** Kolo 3:12-13

lekepelemiko legesó iki likigika kimiki minalo.

³ Itó hulúmini nagalatunú múnahелеketamóma neve. Nenemú ámina nagá hukikataze, eza gizapa otiko eza gizapa otiko iki Sikalahulímo lekelémo hamó ikú nene minalo. ⁴ Ómasímo okulumakú helisa henoni hámakokumú lakagata losi gelemiki ageva iki minatave loko sele lo lekemeneimómáminoko mulusi hámakó nouhá itó Sikalahú hámakó neve. ⁵ Guivahani hámakó noive, itó monó hámakokumú gele alévolé oaká nouhá, itó monó nagamí hámakó holoaká noune.

⁶ Itó mukitó ameteho Ómasi hámakó noive. Áisi monéna mukitoka livilege zaká maká oko noive. Itó etó etó oko zámuzá limike hize lé olimikago aí hozaváa aleaká noune. Itó eza mulutegú etó etó oko minoko aleko oaká noive. ⁷ Kilistó eza lehizeleta polosava monolímini zámuzá etó etó oko ale minoaká noune. ⁸ * Nenemú nene monó gotolaú luhuva gakó makó láa loko neve: Eza veletoka mezane noitike nagá numukú minamoláa kigizató alike kelémo otimó neve. Itó monolímini zámuzala nene vegená lehizeletamóma neve.

⁹ Veletoka itimó nenémini mogonáa lá oko neitive. Eza mikasi agikagú lemeneikutí atiginá oko itimó. ¹⁰ Itó ámina limi ve nenémo atiginá oko okulumá avilegemo avilegemo itimó nene aí ametamenímo okulumakuki itó mikasiguki mino gikí oko minative loko iti ve noive. ¹¹ Itó monolímini zámuzá lehizeletamó nene vegená lugáa nene aposolo lelémo molamóma neve. Itó lugáa nene Ómasímini agepagutí gakó liaká

* **4:8:** Age 68:18

ve itó lugáa nene Izesuni gakó lamaná li hutilí iaká ve itó lugáa pastoli ve itó monó tisa, ¹² keza monó gilina gevená mukitoka kelémo vatí ikiko keza monolímini gelegelelää minatave loko itó Kilistoni mulusi leza monokú voko napa itune loko vegená nenéminoko lelémo molamóma neve. ¹³ Lá oká lá oká oko hozaváa aluko gele alévolé oakate itó Ómasímini gipalámini mogonáa gelekate nene hutilí iko ligika hámakó miniko monokú alévolé oko Kilistoni ametamenigitana ale luhokinake napa oloko ititune loko ámina zámuza lehizeletonoimóma neve. ¹⁴ Itó lá okiko leza namuni molokoko minaminake amuza moloko nouko logoka viziaká ve keza soza sazagi li limikiko, soza saza gakóinímini hepelaámo lelémo mómoká okiko neneló gímizitupe neneló gímizitupe lokatunize. ¹⁵ Leza ligika kemeko gakó gihiláa loloko vinake matute loló oko noi ve Kilistotoka gímizekinake alévolé itune. ¹⁶ *

Aitoka miní amekuko amelaho vémo múnahe lamaná olimikiko apize lamaná oko mininake aí agupémini gelegelela mininake agisa agizani loló itunize. Lá noinake zámuza limi avotigí alenounimó neneló moloko lamaná oko hozaváa alinake ligika kemeakalímini nasahilikú napa oloko vitunize.

Litaha lemetameni ahulokinake gosohá lemetameni ale luhatune

¹⁷ Nenemú neza Guivahanímini avogisaló lakagata aleko lo likimitoze, gililo. Hetoka vegená lugáa keza kagata giliaká niamó nene ha netakumukó giliaká niave. Keikitana iki

* **4:16:** Kolo 2:19

miniki aliki amilo. ¹⁸ Keza nene kigika kagata koló amigo negi nagi hiziki kigika hize lí okago niakumú Ómasilokatí alévolé kemetameni alita netá kemegesa amikave. ¹⁹ Itó kigikáini hize lí okago netá golesamú kovoza ma helesá amigo, mokoló netalímini agikagú niake, golotuva netá haitopaitolíminimú kumu helekago godelé kepelemigo lilí iaká niave. ²⁰ Lekelisi nenéminiki minatave loko Kilistoni mogona lo lekemesá amuháma neve. ²¹ Aí mogonáa lo lekemenouháma neve. Itó Kilistotoka viki gímizikago aitokatí gakó gihiláa lainim-oleketuko gilinamóma neve. ²² * Litaha lekemetamenigi miniki aliki iaká ago itó lukumu hilimó nenémo soza lokoko lokogoka vizekego lapuluva oaká imó nenazo, ámina litaha likigikama gololohá ilo. ²³ Itó likigika lakagata alémo gosohá lilí ikiko minino. ²⁴ * Ómasímo gosohá lekemetameni ale utó imó nene ezáa ametamenigi miniiki hee hee loko minoaká itó etó oko keké vizeko minoaká netá ali utó milata lekemetameni nene ali luhalo.

²⁵ * Nenemú lekeza soza saza ahulalo. Leza apize lamaná unike aí nagá loló okuháma nenazo, nenemú gakó lamanakó eza lo amiko eza lo amiko iki minalo. ²⁶ * Mesahagú miniki lihimá alikataze. Mesaha oká likizapaló moloká iki niko ho nene lememino. ²⁷ Lá itamó nene Satani nene gahe sigitaminigave. ²⁸ Gumina aliaká a vegenalita ámina netá ahuliiki likigizanitunú hozaváa amuza miliki aliiki nosánetatini henokanotini ali utó miliki vegená ámemena nasahilí okekatune

* 4:22: Kolo 3:9 * 4:24: Kolo 3:10 * 4:25: Zak 8:16 * 4:26: Age 4:4

liki ámina zámuzagi minalo. ²⁹ Ulínaka gakó lekegepagutí makó lamilo. Gakotini gilita veg-ená kelémo lamaná itune liki gakó lamanakó liki eza hize lé otiko eza hize lé otiko oaká gapomú vitagá ilo. ³⁰ Ómasímini Sikalahú nene nemú manamú liki ahelukalú amilo. Aí nene gamena napaló nene asele zeletatimó nenémini zazaváa minative loko lehizeletonoimóma neve. ³¹ Ekesá gakó mesaha gakó mukahá gakó itó vivi vovoga aleko letovo oaká gakó nuwane giliki gili ahulalo. Itó lova likigika amino. Itó likizapaló molamino. ³² * Lekeza likigika geha ziko likigika eza amiko eza amiko iki apizi lamaná iki minalo. Ómasímo Kilstokumule loko lihimavatini ahuloleketamómáminiki eza lihimavala ahulotiko eza lihimavala ahulotiko iki minalo.

5

Lapanalímini luhuva loló inake nenémini avevezahaló minatune

¹ Lekeza Ómasímini izegipa gihila minatita aí avevezahaló minalo. ² * Lá niiki likigika ke-meakalímini agikagú miniki aliki ilo. Kilstó eza ámina oko agika limike lelikumule loko agupéa latila imó nene Ómasi guguni gizo amigo Ómasímo anuva giligo lamaná imó neve.

³ Lekeza monó vegená nianazo, mokoló netá itó musi netá itó mulutikú nihunihi nene lekeli holutikú utó amino. ⁴ Itó ulínaka negi gakó giza zohí gakó golesa litamó nene etaminogo inazo, ámina netá ahuliiki Ómasi agepoka liki minalo.

* 4:32: Kolo 3:13 * 5:2: Gá 29:18

⁵ Lekeza láa liki gili alévolé iki gili minalo: Mokoló vehe itó musí netató vehe itó mulúikú nihuni-huló ve mulutikú nihunihu nenémo soza ómai netá ámegetoakaláa geleneimó nenazo, ve nenémináa keza Kilistoni itó Ómasímini avogisaló miniki aliki ita netakumú nene vitagá itamóza, ma alemini-gave. ⁶ Golesa netá nenémináamú nene Ómasi gili amema vegenatoka Ómasímini mesaha utó inogo inazo, lokogoka viziki lekelitoka soza saza gakó li likimikikoma, giliko gihiláa loló amino. ⁷ Nenemú lekeza vegená nenémináagi mini apiziki minamilo. ⁸ Lekeza gozapá límugusigú minamóma nemóza, itína nene Guivahaniloka gímiziake lapanatini gili lili iake niave. Nenemú lapanalímini luhuvaváa lili iiki nenémini avevezahaló minalo. ⁹ Lapanalímini gihiláa lá oko utó oaká noive: Ligika lamanaki minoaká itó hee loko minoaká itó gakó gihila loaká, ¹⁰ nene netá matá oko moloko itune loko Guivahanímo giliko lamaná iti netakumukó vitagá ilo. ¹¹ Lugáate límugusímini netala itó hutuváa lili nikoma kezagi mini apiziki minamilo. Lekeza ámina netá golesáini nene ali hanatalo. ¹² Netá asugunatoka aliaká niamó nene lovoza heleaká netá nenazo, nene gakó lamitune. ¹³ Netá nenémináa ale hanatokuko, lapanalímo hize hanatokiko, utó o lamaná inogo ive. ¹⁴ Itó utó oaká netá nenémináamo nene lapanaki loló itimó neve. Nenemú monó gakó makó láa loko nemóma neve:

Lokovó akina ve lekeza otilo.

Itó hilinita ve lekeza mómoká iki otilo.

Kilistó nene hize hanatoleketanogo ive liki luhuva gizinamóma neve.

¹⁵ Nenemú lekeza miniki aliki itatoka nene gizapa etoha iki minalo. Itó negi nagi hiziki minamiki gili vevesiki minalo. ¹⁶ * Itína gamena nene golesa netalímo hutilí onoinazo, nenemú netá lamaná aleaká gamena utó olikimitimó nene ma likivilegemino. Gamena ha okatize. ¹⁷ Negi nagi netá lilí iki minamiki, Guivahanímo lititoka molatitoka iti gapomú vitagá ilo.

¹⁸ Piá nagamikumú lekemeni zemilo. Nenémo nene likigikatini ale gopa okatize. Ómasímini Sikalahú nene likigikagú mino vaí ino. ¹⁹ * Ómasi agepoka lili iki ipá apá nama itó monó nama itó Sikalahulímo lekelémo vávani iko gosohá nama eza lo amiko eza lo amiko iki likigikagú Guivahani agepoka li amiki nama liki lokogoliza vizí vizí iki minalo. ²⁰ Lá niiki Guivahanite Izesu Kilistoni agulizá iki mukí netakumú gamena gamena Ómasi ametehini agepoka lili iki minalo.

Ve aleve iki miliki ita gakó

²¹ Lekeza Kilistoni goliva gilitiki eza gelekelé otiko eza gelekelé otiko ilo. ²² * Vená lekeza vatinitini kagahaisiuka niminiki Guivahanímini agahaisiuka niminamó loló ino. ²³ Kilistó eza vegenala zuhatini gotóini minake ale nupa oko gizapa olimiaká noive. Agisa agizani agupéa leza nene nouko eza lugutó vizeaká ve noive. Vená keza ámina iki váinitini kigínaló niave. ²⁴ Nenemú Ómasímini vegenala zuhate Kilistoni agínaló niamó ámináminiki venatini nenete minimi limiki

* **5:16:** Kolo 4:5 * **5:19:** Kolo 3:16-17 * **5:22:** Kolo 3:18; 1 Pit 3:1

váinitini kagahaisiuka minataze. ²⁵ * Ve lekeza venatini nene likigika kimitamó nene Kilistó monó gele gevenakumule loko agika limike agupe latila ike hilimómáminiki likigika kimilo. ²⁶ Kilistó lá imó nene vegenala zuha kelémo etó okiko golotuva netá keitoka minokative loko itó monó gakolatunú nagamí zekoko lusa gekiko ²⁷ ezáaloka ale akolotake likigika gizopa lo minikogó lihima nomimó etó ikigó minatave loko hilimó neve. ²⁸ Itó ve lekeza lekezatini lukugupemú miluma giliaká niamó ámináminiki venatinimú milumáini giliki likigika kimilo. Lekelikutí makolímohe makolímohe venalamú miluma geleko agika amitimó nene ezáa agupemú nene miluma giliti netá loló inogo ive. Ve makolite kugupenini mukahá apilisá amave. ²⁹⁻³⁰ Leza lugupeva gizapa lamaná otunike nosánetá amekogó minoaká noune. Leza Kilistoni agupe agisa agizani nekisáa nounimómave loko aí vegenala zuha ámináminoko gizapa olimiaká noive. ³¹ * Nenemú monó gotolaú gakó makó lá oko neve: Ve makolímohe makolímohe izolahiko amelahiko ahulokimioko venalaloka voko gímizekiko keza kugupe kigika mili hámakó iki minatáive. ³² Itó ámina gakó amegesáa halá ge minamó nene Kilistó itó vegenala zuhaloka voko alekative loko noluve. ³³ Nenemú ve lekeza mukitó nene lukugupelinimú giliaká niamó ámináminiki venatinimú giliki likigika kimilo. Itó vená lekeza mukitó nene vatini kugulizáini ali otiki kilími napa ilo.

* **5:25:** Kolo 3:19; 1 Pít 3:7 * **5:31:** Apí 2:24

6

Izegipagi izóike améike iki miliki ita gakó

¹ * Mohó gipa lekeza Guivahanimule liki izotikini ametikini gelekelé ikitiki keí gakóini gili alilo. Nenémo nene lekelí gapo loló onoive.

² * Geza izokahiko amekahiko kugulizá ale otezo loko li gakolímo gapo lota gakokutí nene ámina gakotó ganá miní ameko lo mololetamómagi neve. Láa loko lo mololetamóma neve: ³ Lá itanimó nene mikasigú mino lamaná oko gamena hána mino-loko voko minanogo ane, loko lonoimóma neve. ⁴ * Itó izóikita améikita lekeza nene mohotini izegipatini keza kizapaló molati netá lilí ikitamilo. Guivahanímini monokú kagata aliki kilími hee hee liki gakó gilitave liki kagavutó zilo. Lá iki gizapa nikitiko monó gapogú viki napa itaze.

Gelekelé vegenaki kugulizaki vegi iki miliki ita gakó

⁵ * Gelekelé izegipa lekeza mikasiuka kugulizaki velini gelekelé ikitiki gakóini gili aliiki likigika lamaná ominiko lá ikitalo. Lá niikoma Kilistoni gelekelé nitamó nene gilinogo ive. Itó keikumú giliko gena noikoma legesó iki miniki gakóini gililo. ⁶ Lekeza nene kugulizaki velini lukugupe lekememi kimiiki gelekelé nikitiko hanuva lelí ániigi lamaná itave likigopa, leza Kilistoni gelekelé nenémináa minatune liiki Ómasímo lititoka molatitoka iki lá ilo. ⁷ Vegenakumú hoza nalune likigopa, Guivahanimú nalune liiki mulutikú lamaná giliiki hoza goselekaselé amiki alilo. ⁸ Lá

* **6:1:** Kolo 3:20 * **6:2:** Gá 20:12; Gapo 5:16 * **6:4:** Kolo 3:21

* **6:5:** Kolo 3:22-25

niiki gelekelé izegipa niamó itó kugulizaki ve lilí iki niamó keza mogona lamaná lilí iki minatamó nene, Guivahanímo nenémini helegáa ámináminoko meinaváa kiminogo ive liki gili minalo. ⁹ * Itó lukugulizaki ve lekeza gelekelé izegipatini nene ámina iki kilími lamaná iiki gamuni iki ahulikitalo. Lá niiki láa liki gililo: Gelekelé izegipatinigi itó lekezagi nene okulumakú Guivahani ametipo hamokó noive. Eza itiki minamó limiki minamó mukikumú giligo hamó lelegitokó niave.

Ómasilokatí gimisi magé lova netá ale ligizakú molatune

¹⁰ Lo asú oko litoze. Guivahaniloka viki gímiziiki aí zámuza napa lekelitoka neiko nenémini agikagú miniliki viki alévolé ilo. ¹¹ Satá nene asugunatoka logoka vizeaká suni alinogo noiko nene helisa ali-iki nitatotí nene amisele ahulatune liki Ómasilokatí gimisi magé lova netá ale likigizakú miliiki gizapa iki minalo. ¹² Leza hanuva lugupegi vegenaki lovasava osá amune. Kugulizaki ve napa itó guivahani alévoleláa imane límugusi gamenaló gizapa ve niamó kugupe nomimó ánígamoakalímini golesa netá okulumá sepenauka niamó kéisi lova ali limiaká niave. ¹³ Lá niamó nenazo, nenemú lekeza Ómasilokatí gimisi magé lova netá ali asú iki miniiki lova golesaló amuza miliki niko gala ve keza iki lou niiki vikiko lova hizi asú itató nene lekeza áminaló alévolé iki minanigave. ¹⁴ * Lekeza lá iki otiiki minatave loko noluve: Gakó gihaláa getelini loló noiko, Ómasímini avogisalo

* 6:9: Kolo 4:1 * 6:14: Isa 11:5, 59:17

lihimatini asú olikimikago minatamó nenémo apitiniló geha sioti loló okiko ali luhiiki minalo. ¹⁵ * Hulúmini gakó lamaná ali guni iki ali minatamó nenémo likigisa suú loló okiko lisi gikitiiki minalo. ¹⁶ Lá niiki izolahináa napa nene Ómasimú gele alévolé atímo lagelini loló okiko, gamena gamena likigínagú miliiki niko, golesa netalímini amelahóá gimisivagutí magelámo satokiko magelímini loláa lihatize. ¹⁷ * Lá noiko, aenitunú akilitini agulizaláa lekelémo lukugutó vizeaká netá nene ali hitiiki Sikalahutokatí Ómasímini gakó nenémo sopolo hánalini loló okiko ali minalo. ¹⁸ Lekeza gamena gamena Sikalahulímo lekegepa ale vávani noiko Ómasiloka miní ami amiki liki voká liki minalo. Itó zogozogo vizemiki goselé lekepelemiko gizapa iki minalo. Lá niiki monó gele vegená mukitoka keikumú numuna hoza alilo. ¹⁹ Lá niiki nenikumú nene Guivahanímo negepáne ale vávani okiko Izesuni gakó lamaná goí oko asuguná oko minamó nene negepa atilinake vávani oko lo utó molative liki lekeza numuna lilo. ²⁰ Neza ámina gakó lamanakumule loko gakó lo utó utó ve nagá numukú noutímina Ómasímo lonetatíminoko nelegesá legemiko lo utó molative liki nenikumú Ómasiloka lilo.

Gekéini loketamó

²¹ * Minoko aleko noumó nenémini mogonáa itó hozaváa aleaká noumó nenemú gilitave loko Tikikó nene voko gakó lo likiminogo ive. Eza ligiviteho gihila Guivahanímini gelekelé izegipala

* **6:15:** Isa 52:7

* **6:17:** Isa 59:17

* **6:21:** Apo 20:4; 2 Tim

4:12

hozagú alévolé oko mina ve ²²* áisi lelí gakoláate lo lekemeke mulutikú ale lamaná itive loko amiselekugo núane novive.

²³ Ómasi ameteho itó Guivahani Izesu Kilistó áisi nígive nagave hulu ale utó mololeketoko gele alévolé oakatini ale hutilí olikimiko likigika eza amiko eza amiko iki minataye loko noluve.
²⁴ Guivahanite Izesu Kilistotoka gímizi lamaná iki likigika amiaká nia vegená lekelitoka Ómasímini nasahilí nenémo mino moloko minino.

* **6:22:** Kolo 4:7-8

**Monoq Gotola Gosohaq
The New Testament in the Alekano (Gahuku)
Language of Papua New Guinea
Nupela Testamen long tokples Alekano (Gahuku) long
Niugini**

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

44bc4c3c-532b-5251-95bd-2c3cfdce78ba